

陶山文錄

陶山文錄卷八

善化 唐仲錫

墓誌 墓表 傳 狀 書事

前揚州府知府伊君墓誌銘

嘉慶二十年秋九月前揚州太守伊君卒於揚州州人祠其主於湖上之三賢祠賻其子念曾扶輿歸閩越明年念曾匍匐金陵乞銘於執友唐仲冕曰公許爲先人志墓今將葬矣敢述行狀以請仲冕謹諾君諱秉綬字墨卿汀州寧化人六齡就塾穎異爲大父所喜稍長益向學恪奉庭訓師陰靜夫先生與聞先正雷翠庭先生

講論以居敬窮理爲宗守以敦篤出爲循廉初入刑曹
受知阿文成公任以綜核秋讞出守廣東惠州豈弟方
嚴豪歛弱植建豐湖書院牖諸生以小學近思錄海上
人士皆知有考亭之學矣其慮囚亭疑法如海盜中有
被脅未從盜者二十有二人律載三年減死此五年憲
府疑當重論君以委未行刼五年一如三年宜從實請
卒得問遣陸豐巨猾肆刼勒贖遲者支解君力請上司
震以兵威縛其渠七人戮之故歸善博羅永安之變陸
豐安堵歸善有陳亞本博羅有爛屐四將爲亂君皆請
提督興捕不應乃以計擒亞本適緣他議去職而博羅

變作矣君且有遣戍軍臺之罰博羅餘黨竄永安新制
軍巡惠惠人訴君冤丐還君者數千百人制軍入
告

上知惠州士民有總督不聽知府未早發兵撲滅之語
恩免戍臺事既伸僚友相伙復官奏發南河旋授揚州
府時淮南大水君方檢高郵寶應災傷刺一小舟雖棲
戶枉渚必親閱手書及之任尤劬躬率屬賑貸紛紜鉅
銖必覈吏無所容其奸倡富商巨室蠲置粥廠以鉅萬
計誅北湖崔苻鐵庫子輩杖校詭道誑愚之聶兆和故
民雖饑困心無惶惑是年仲冕亦督察鹽城阜寧荒政

君寄以詩如春陵行相勗真心揀濟尋以憂去士民懷
思不衰迨服闋入都過揚勾留談讌不忍遽離而遂終
焉殆非偶然君先世由太原遷寧化高祖某順昌縣訓
導耿藩僞將刼掠不屈耿敗乃免以曾孫貴贈奉政大
夫曾祖某贈朝議大夫祖某以孫加級請封晉贈資政
大夫考朝棟乾隆己丑科進士累官光祿寺正卿晉封
資政大夫光祿公講學有淵源立

朝有氣節嘉慶元年六十有八恭與

千叟宴君扶掖以入十年君以復官 召見

今上垂詢光祿有朕惜未見之諭其德望如此光祿公

親受業於雷先生得聞學真傳君紹聞既習立志最早
晚年專心慎獨故自律已型家蒞官以至綴文作書皆
是物也而世或譏之夫曲學俗學無論已卽詞翰重選
學攷訂重漢學惡知心性之學哉著坊表錄攻其集修
齊正論未成書有留春草堂詩七卷君年十六補弟子
員已亥舉于鄉已酉成進士改刑部主事遷員外郎戊
午科典試湖南京察一等兩任知府權河庫道及鹽運
使司皆有廉聲君生於乾隆十九年正月卒年六十有
二娶李氏夫人生子二銘祖監生候選布政司庫大使
念曾嘉慶癸酉科拔貢生候選教諭女二皆適名門孫

二性存念曾子成存紹祖子某年月日葬君于某山之
原銘曰

名父之子人師之弟敬義夾持動必以禮曲突謀沮遺
黎嗚咽城旦書成

聖主昭雪拊溺若沉處脂不潤治身治官一秉忠信奉
諱家居將母秋園旣愴風木廣置義田武夷匡廬晦翁
遺躅匪云好游以寫衷曲出山遲回良友敦勸魂兮歸
來若孚與願讀君詩集春長留摩君分隸風格迺報春
秋兮俎豆蔭子孫兮松楸問學無朋兮使我心憂

先生與太守以道義相切劘讀銘中問學無朋兮使

我心憂二語可以鑒其友誼矣

廣平拜讀

欽賜祭葬祀昭忠祠署定陶縣知縣賀君墓志銘

君諱德翰字勺莛長沙寧鄉縣人先世由吉水屯長沙
明永樂初徙居寧鄉曾大父發大父清寅皆諸生曾大
父考授州同母老不謁選有拾金還人事大父蠲穀百
石儲社倉皆載府縣志父嘉謀國子監生母蔡氏君生
之前父父焚達官至堂傳呼接

詔生而端偉穎異九歲能文乾隆己亥

恩科以廩生舉於鄉嘉慶辛酉年大挑知縣發山東歷
荷澤鄆城利津朝城范縣定陶皆有廉能聲卒殉難定
陶年六十有四先是首逆林清伏莽近畿藉邪教嘯聚

陽山文鑑卷八
五
煽惑以癸酉年九月構逆於直隸山東河南地錯交而
兇黨徐安懼朱成貴等分擾曹縣定陶初十日昧旦蠶
至定陶城外委張廷立率守卒數十人拒之傷斃君知
事急取印付僕李庭來齎郡而白衣冠升堂大聲諭之
弗退且劫獄君三日前聞陷滑縣練義勇未成隊君卽
率之迎捕力不敵遂死之君死時罵不絕口故受禍最
烈賊退邑士民收其屍哭奠三日後觀察熊公方受驗
視乃殮顏色如生中丞同公興以

聞奉

旨如例賜卹予雲騎尉罔替卹葬銀各百兩致祭一次

國史立傳祀長沙府昭忠祠君性和易獨於名節所關則辭氣震厲居官案無留牘在朝城嚴治竊盜閭里安枕回民叢毆傷人人畏其橫君必按問如律徵賦請行江南版串法民便之在范爲糜粥振貧饑粥可立箸乃分食之權定陶米一月卽罹難當是時承平日久民不知兵不軌之徒變起倉卒甚至逆

天犯

闕毒流三省然不旋踵而殲磔靡遺蓋

國家德澤淪肌髓故雖稂莠蔓生而芟夷溫崇之無難也夫平日培之薊之責在州縣使爲政期月化行而禦

儻有備必能式邊安堵無如時蹇而變劇然君致命遂志吏民感歎烝嘗弗衰

朝廷褒卹子孫榮蔭可謂不負所學矣余與君計偕相友善每以行誼交勗是年余監試出闈得君八月中旬書言抵任檢災甚勤未及復而邸報君死難矣爲之歔歔流涕信君之不媿其言也君子懋榘以君行狀寄余請志其墓余曷敢辭君配王孺人同邑進士廣西上林令忻之女先君卒子三懋榘蔭雲騎尉懋榘懋樞皆邑諸生女四皆適士族孫二容燭榘生容煥榘生孫女七皆幼君殉節之明年三月懋榘等始自定陶扶櫬歸里

卜吉於某年月日葬其邑之二都九區東茅嶺之陽銘
曰

砥行以豫臨難不撓況佩名義當

仁聖朝綰綬執殳咸爲毅魄所尤難者官攝時迫君學
有原有文有政文惟理明政惟經正瘼犬旁獬突不及
防惟志素定處變如常歸神故土

旌寵葬祭臣節

國恩施及苗裔

賀君得此文可以不死矣

郭磨讀

海州學正翁君志銘

君諱咸封字子晉蘇州常熟人順治丁亥進士河南叅政諱長庸之五世孫康熙丁丑進士福建上杭縣知縣諱大中之元孫曾祖俸祖汝明父謙貤封修職郎君乾隆癸卯科舉人官海州學正凡十二年嘉慶十五年四月十四日卒於官余知海州見君貌沉而言簡知其篤行績學君子也海州雖隸江南隔海潮河淮江湖之廣學士大夫罕至地瀉而瘠數被水潦民治生不給故就試於淮安江寧者鮮

國朝以來領鄉薦者僅一二人余思振興之術責在師

儒適得君爲學正廼謀建石室書院以君爲主講是年
水旱洊臻君進救荒策請賑得行君雖陟伏學僚而守
義不苟通經史明體達用於吏治民生得失利病無不
周悉行其言輒有效廼與君圖政所當先者於是誅吏
胥之蠹民甚者兩三人寬州民籌鹽之禁而翦鉏梟販
鈎致拔刀巨盜寘之法自板浦開渠至城東門爲甲子
河以通薪米凡有興除君必懇懇而成之有一言一行
之弗協於義弗宜於民者必規改乃已於是選開敏子
弟納之書院而厚其廩以書院爲試院請學使者親臨
歲科併試以省寒畯跋涉之勞手修百有餘年未修之

州志人謂編輯精詳甄錄嚴慎得君之力居多州大如
斗五年之間舊害不生文獻粗備非夫人之力不及此
余移知通州聞丙寅五月開王營減水壩海州平地水
深數丈君被檄渡民保大伊山諸高阜撫賑紛紜多所
全活復還定勞來安集之此豈迂儒所能爲而老於文
學嗚呼惜哉君至性過人少時祇其曾大母病目而痊
割左股以療親疾季父疾亟叩頭以禱額爲之腫家貧
好讀書早有聲名公卿間晚歲絕意仕進雖豆羹麥飯
不贍怡如也余嘗以秩滿保薦爲令牒旣具力辭不就
生平著作矜慎有文一卷詩三卷常追念曾祖祖兩世

節母懿行蒐輯邑中自明以來列女事爲虞山壺史未脫稿屬其子心存續成之心存嘗從余游綽有父風必能繼其志也君生於乾隆十五年四月五日酉時年六十有一配許氏先君卒繼配張氏子二人鏡許出娶曾氏心存諸生張出娶許氏孫三俱幼以某年月日葬許氏壙合葬於頂山祖塋心存謁余銘因序次同官之誼及其行狀而銘曰

輔牧以政規勸罷行廸士以學行修經明政學蘊躬辭榮却薦道在潛虛貧同次憲我亡畏友士失明師流庸復業安忍忘之石室傳經式穀有子幽宅旣安昌其後

起

寒宗蘇郡有三支常熟洞庭平望同出宋無錫尉景
文公後咸封爲廣平族姪昔聞其有孝行而未能詳
讀此志亦頗有足傳者然非夫子知海州咸封雖有
行善政之心不能見之行事也其子心存丙子舉於
鄉可謂有子又得此志足以不朽矣

廣平拜讀

會同縣教諭李君墓志銘

君諱道寧字坤亭湖南善化人也先世居邑之側茅嶺
前明多聞人詳郡邑人物志曾祖有藻康熙初廩膳生
贈奉直大夫妣胡氏贈宜人祖天柱康熙某科舉人信
陽州知州奉直大夫入名宦祠妣黎氏宜人父聞知雍
正某科舉人平江縣教諭交林郎妣車氏孺人三世皆
有集行於世君乾隆甲午科舉人選會同教諭以疾辭
不赴嘉慶某年月日卒距生於乾隆某年月日年若干
歲君性直諒有丰稜寡言笑與人交始終不渝然與脂
韋滑稽輒齟齬不合教子嚴而有法會同學官租入頗

豐人勸之任君曰不可以衰病溷學校其安貧守義類
如此先君子爲信陽公門人於平江公爲友然嘗言文
章得力於平江公爲多平江公勘點文字高踞一席先
君子侍立拱聽平江公無媿色先君子亦無倦容忠告
且然義方可知君之受教於平江公也稍不稱意投之
以硯額且損故君教子弟一守其家法不少撓余以通
家世好爲同年友其孤某將葬君於某原以書求志其
墓謂君落落寡交此事非余莫屬余何敢辭君配某氏
繼配某氏子二長某諸生娶某氏次某娶某氏女幾人
長適湘潭編修石承藻次適某孫幾人銘曰

家傳哲匠世守方軌義不苟祿況於財賄室無斗筭楹
有書史歸真此宅宜爾孫子

蹕駿肖退之

郭麐讀

湖南長安司巡檢王君墓志銘

君諱敬曾江西泰和縣人祖惟先父德佩皆勉贈登仕
郎君少穎異家貧負米蜀道以賤記客州縣幕金川軍
興得從九品告身選湖南巡柱司巡檢尋遷臨湘長安
鎮爲民平爭鬥不受粟米招生徒之向學無師者延師
與其子同課之某氏有文字獄繫其眷屬廿餘人君善
撫其穉孫遇赦得釋嘗署安化典史杖邑胥之不法
者兩巨室爭墓地各百餘人持械以待君履勘定讞無
敢譁署湘陰丞攝縣事有贗造白金者株連二人君訊
釋之後解餉遇難卒得其力又署東安典史民有屠牛

報判錢君曰寧餓死不可污也年八十休官不克歸卒於長沙旅舍君少孤奉母劉甚孝爲人佐忠敬且久官雖卑不以貧易撝去之日民咸思之生於康熙某年月日歿於嘉慶某年月日配李氏子二雲監生湘從九品雲嘗爲余弟子有文才將葬君於長沙某山不遠數千里求銘於余以余與君有一日之雅也因爲之銘曰四十婚宦八十休官一命有濟百行乃完存爲長吏歿爲寓公式穀有子慰爾考終

要言不煩筆亦簡老

郭磨讀

原任江西萍鄉縣知縣胥君墓志銘

君諱繩武字燕亭山西鳳臺人也以乾隆丁酉科拔貢生出宰萍鄉署饒州府同知緣事失職恭遇

慶典復前階於嘉慶十三年某月某日卒於浙江藩司幕中年五十二歲君生而穎秀甄綜經史詞筆超朗少年負氣節萍鄉界湖南厨傳駱驛君爲令頗稱強項治民則勸暴植良折獄如神毀叢祠爲泮宮禱雨愆期與神像琅鐺而曝于庭尋獲大澍至今邑人稱之休官年未四十專肆力於詩古文詞貧無所歸乃以度文章奏從事幕府來江南當事爭虛左以迎爲福建張中丞蘇

州汪中丞所推服嘗爲寶山田大令作祭潮文焚之而潮徙文具載集中今年春自號芝天老圃刪定詩文藁爲燕亭集無意遠遊慶方伯自蘇遷浙強之携眷往至未一月以病終慶公經理其喪恩誼周摯其妻張氏奉其柩葬於吳縣之十三都五畝李字圩君大父某有功勲爲人所攘父源母氏石例封文林郎孺人子二鎮元配黃氏出娶某氏靈恩張氏出女一亦張出皆幼君才邁俗於鎮有吉甫之嚴故其歿也鎮不在銘曰

才如銛鋒一割中繁學如大觴萬勞就理釀其才學蒸爲詩歌匪售伊傳得失孰多遊於公卿樂居吳會歿浙

殯蘇神其罔愬有室有嗣无忘遺言感我宿草勒此貞珉

無事多著筆墨自成傑作是非老手不辦

廣平拜讀

金山縣知縣張君墓志銘

君諱思甸字懷禹湖南寧鄉人曾祖某太學生祖某父某皆贈文林郎贈公七子君其次也庚辰

恩科舉于鄉辛丑

簡發直隸以次補武邑令以才調密雲兼工部督理古北口抽分關防丁母秦太孺人憂服闋

簡發江蘇權松江府同知補金山令充甲寅

恩科同考官以疾卒闈中余與君之兄思留爲同年友識君於都門越十餘年同官于吳又同司分校相知最深君性敏于文而質厚重及爲政一以寬大居之雖檀

州孔道每歲巡蹕再經供億裕如若無事焉其奉檄入闈也病疴初愈至金陵復作或勸以疾辭不肯閱薦甫畢遂不起君之盡瘁從公亦可概見矣所薦士獲雋者五人乙科一人主司亟稱其精鑒君生於雍正癸丑年十一月初二日歿於乾隆五十九年八月廿四日年六十有三歿之日十郡糧儲觀察朱公白泉先見君章服自闈中出其殆有精爽至於神明者乎配喻氏繼配楊氏又配范氏子二長年瑞楊出娶胡氏次秩瑞范出聘善化舉人李君道寧之女女子三長適本邑副貢生胡澤滙次適陶宏植三適山東夏津知縣周君平湘之

子監生某時思留同在闈中撒棘始扶柩出旅於蕭寺
將以某月日歸窆某山之陽而屬余爲之銘曰
續屬革裏無苦樂所憑獨賢猷猶爍理無積厚竟發薄
全歸永完嗣啟廓

寫張君盡瘁從公處不必洋洋灑灑已有尺幅千里
氣象信於此中三折肱者

孫淵如

歲貢生李君墓志銘

君諱懷信字誠齋其先自棗強遷岱右君性至孝侍父疾數月衣不解帶居喪哀毀盡禮鄰里感動事母張氏先意承志母疾亟憂禱假寐見老嫗以飲子飲母覺而問疾沉疴頓釋後母壽終遺囑曰汝兄失業無子孫女適孫氏亦貧落吾憂也汝能善釋吾憂吾瞑目矣君旣號咷受所誠以次子汝繼兄後事兄極驩愛兄歿事卹嫂維謹後皆以禮葬於先塋側孫氏子輝展親教讀爲諸生至於敬宗收族葬族子繼文卹姪婦宗氏全其節皆可風也讀書務深闢不爲章句儒詩古文詞必本諸

心得訓後進以敦飭教子有義方以明經老卒年如干
君有子男四人曰溪曰洛者泰山書院肄業生也孫五
人以某月某日葬於某山余爲院長洛來請因銘曰
惟君孝思慰先人惟君潛學化鄉鄰惟君義方裕後昆
嗚呼壽不可永兮克永其名以德爲基兮是用安貞

老梅無醜枝此文庶其髣髴

持謙記

節孝陸孺人墓志銘

孺人陸氏荆溪人年十九歸同邑陳魯歸十六年而嫗
奉姑呂氏又十三年以節孝著格於令未請旌余宰荆
溪時得之閭師爲表其門今其子經以書具生卒年月
節行之詳請銘其墓孺人逮事祖姑祖姑憐之事姑尤
誠篤姑病疽發背危劇遇方藥必含而吮其毒孺人力
任之凡十日而除又有胃氣疾發則痛且昏絕惟按摩
如法乃減孺人嘗終夜弗倦人以爲難其相夫子也以
敬生平未嘗面赤家雖貧知其好客需酒饌必立辦飲
食必後其夫及卒雖蔬果必先奠如生時偶在桃溪故

居得甘瓜未及環祭至敗不食夫雖早世姑已疾壽者有婦如子驪然忘之矣孺人夙工組紉烹飪和婉有儀爲其親愛于歸後姑病時其父亦病居距里所孺人候姑少間輒往省父訓以姑爲重毋頃刻離乃止其持躬以儉課兒女以義方御僕婢仁而有法皆貞孝所流邑志載之孺人生某年月日卒某年月日年七十有五子某某女若干孫某某孫女若干經少孤好學能詩將以某日葬於某山附其姑之墓因爲之銘曰

窶而無乏愉其夫殆而得安壽其姑知人有識禮有初細行足補閭史書孝有根抵枝葉敷髮無絲白老不枯

泉臺侍養慶延餘

序人節孝事不嫌瑣屑亦善善從長意也

特謙記

例贈文林郎寧鄉縣學增廣生黃君墓表

道光壬午夏五月寧鄉黃子本驥禮闈報罷游關中以尊甫石櫓君行述求表其墓謂余輓詩曾有他日題君墓門碣之句今距先君卒三十八年葬亦三十五年敢以請余慨然曰微子言幾負吾執友矣爰序次其狀而述吾兩人少長相於之篤以志勿忘君諱湘南字一吾號石櫓以本貫入津門學補弟子員祖道恩乾隆丁丑進士虹縣知縣父立隆乾隆癸酉拔貢生歷官天津知府母秦恭人君與其兄孿生而兄殤貌晬蹇於行性特穎異讀書十數行下爲文斐亶數千百言不倦嘗一昔

和余紀行長律百篇辭筆淵雋宗工推服然鄉舉輒薦
不售年二十九客歿於淞玉環同知署識者傷之君天
性醇摯人也事虹縣公天津公皆有深愛勿失恃事繼
母章佳恭人時其喜怒曲盡子道有人所難能者恭人
滿洲正白旗人天津公卒且葬恭人孥諸子赴都門命
君守墓君泣求侍養弗許先是君贅通道學博劉公元
燁携眷歸長沙家赤貧仍依劉里宅讀書恒以未得奉
母爲悲見於詩詞者屢矣聞恭人自都赴淞君乃馳三
千里往起居尋以疾卒若幸得省其母雖死無憾君奇
才篤行中道摧折無所表見獨見諸文章撰着敏富不

自收錄今其嗣哀集之得詩三千首詞三百首他雜文稱是都爲一集曰大瀉山房稿讀其書猶可想見其人也余之始與君友也天津公方守大名余以事至以年家子留共君及君堂兄長原同研席且應京兆舉同舟車邸舍詩歌間作誼至洽也余愛君真雖分張音問酬唱不絕訖於君卒有曹華者君舊僕及薄宦江南爲余謙從每追話往時分瓊題襟之好未嘗不對之桑榆也今余年七十矣長原更名湘虔尚宰長垣惟君音徽渺不可追君卒於乾隆五十年乙巳歲越三年葬於四都北山彎之原蓋自潮歸櫬也君娶劉氏湘潭人有丈夫

子二本騏嘉慶戊辰科舉人借補城步縣訓導本騏道光辛巳科舉人女一適善化禮部儀制司主事唐業謙孫二人劉孺人有鍾郝風以節孝

旌於門親課二子制行績學名於世二子能讀父書克成母志鬱積而發無疑也嗚呼由前觀之造物之所以厄君者何其酷由後觀之造物之所以報君者正未艾也余故表而出之以爲他日徵

文筆廉勁而有紆徐之度酷似歐陽公志尹師魯墓其情真故其詞肖非有所摹擬而得也此文出而先公可以不朽不孝孤本騏跪讀

例授文林郎辛酉科舉人候選知縣蔡君墓表

君諱復午字佇蘭江蘇吳縣人系出宋忠惠公襄

國初廷華自閩遷吳爲君高祖曾祖王禎康熙乙卯舉人官四川仁壽令祖芹蘇州府文學父震國子生母王孺人生母陸孺人生君兄弟三人君長次師申晉亥皆以卦辰命名君有夙慧七歲能詩孝友性成九齡居王孺人喪盡哀如禮其後侍親癯衣不解帶者輒數月持父及陸孺人喪皆哀毀骨立撫兩弟怕怕如也無間言君故家貧爲諸生橐筆遠遊渡錢塘沂彭蠡踰嶺客廣州已而歷長沙武昌以歸及登賢書復因座主湯价人

出守游粵西者數年所到攬其山川之峭厲卓傑與其風會謠俗發爲詩文皆疎宕有奇氣其郡邑官師生儒爭迎以爲矜式若慶遠之宜山岳州之平江平湖之當湖諸暨之毓秀東臺之西溪諸書院延主講席從之游者文行咸有可觀蓋君持躬謹篤寡言笑與朋友交守信義不詭隨余嘗慕東方曼倩明濟開豁因以自況且寫爲真君見之曰公乃自儼滑稽耶余爲憬然其直諒類如此爲文本經術力追大家制藝尚理法尤足起衰式靡以故爲世宗工所推重而及門者自不同流俗也博通象緯勾股輿地名物象數小學音韻旁及日者醫

卜諸書著有州縣地理考經義典制考纂輯東臺縣志及詩古文時文人多傳誦之自東臺志外尚未及手訂付梓惜哉聞君之生也母夫人夢有瞿曇投生君平時亦數數夢古剎廬下步月聽鐘近年繪爲行看子且著地獄論三篇輪迴論二篇發明易大傳原始反終之說而君以無疾跏坐而逝豈釋氏之言果可信耶抑又何以不使之攄夙蘊經世濟時而令屢困公車遽歸兜率耶吾以爲其理果不足信也君生於乾隆廿八年癸未十月廿九日卒於道光元年辛巳七月十四日年五十有九中嘉慶辛酉科舉人揀選知縣娶夏氏先君卒子

附錄
六人成輅四川候補主簿婦吳成彥婦施公輔婦周踵
武聘戴鴻遵應甲女三人孫二人濟定公輔出慈珍成
輅出余與君有通家誼旣葬其孤成輅請曰前年乞先
生爲先妣銘傳今更乞表先考墓感且不朽余弗克辭
爰爲之銘曰

其性慤誠其容專穆其行端嚴其文清淑筆助江山津
逮庠塾寄精神于簡編詒子孫以式穀人以爲尊宿之
根器而吾以爲儒先之似續雖未仕其何傷傳方來而
已足

家君在生時嘗聞先生緒論先生重家君直諒亦樂

與之譚今者表阡之文皆就信而有徵者書之非尋
常諛墓者可比輅等世世子孫感且不朽豈獨光賁
九幽已哉

成輅敬識

長沙宗聖祠奉祀生曾君墓志銘

聖朝崇秩 先聖賢既各立學官設冢戶置五經博士
矣又於其後裔之分徙他郡邑者亦得聚族建祠擇善
行爲奉祀生以肸鬻芬烈傳諸無窮而其裔孫遙承胄
緒能束身名教以詩書啟其子弟以昌其間斯爲良也
曾君衍先字補之 宗聖曾子六十七代孫也由嘉祥
遷江西至五十六代祖芝客湖南之善化明末復歸永
豐又來長沙大賢都後徙省城迄君父子始貫善化迄
時湖南客籍長沙湘潭拒不納以善化爲藪或疑邑人
士有他端余謂流品不雜畛域可通如君父子爲 宗

聖裔夫復何嫌君少有志功名無所遇乃出其蓄而爲人佐中年歸族里却掃敦行歲戊午合族爲宗聖立祠以君董其役祠成謂君人品端方堪膺奉祀由衍聖公會同巡撫學政咨禮部選補而君益自刻勵義方必嚴矣子興仁初以國子生應鄉舉卽登丙子賢書蓋報之速而未有艾也君奉祀生以子揀知縣

例贈文林郎生乾隆壬午卒嘉慶己卯年六十有八配蔣氏

例封孺人子卽興仁孫二毓達毓達卽以是年秋八月葬羅眷岡之阡而以墓志不遠二千里請銘于余興仁

甯氏婿余亦其姑壻有戚好故不克辭銘曰

一貫薪傳門人莫喻實踐有由曰惟忠恕近譬求仁道
在彊勉況爲苗裔而忘數典君謝浮躁砥厲廉隅成人
之美然諾不渝與忠恕義默相符契不媿辦香以承支
祭業完而歸身固而藏積培之數視其後昌

流品不襍畛域可通二語卽普天之下莫非王土意
也其識卓其文簡必傳之作

持謙記

荆谿布衣陳生墓志銘

乾隆五十有八年余宰荆谿初試士得陳生景辰詩卷愛其澹雋引爲友生及余量移他郡生徑棄科舉業專肆力於詩古文詞客冬携所著續太平廣記三百卷請余校定余方陳臬未遑還其書今歲孟冬其友董君瑚等啟門來言景辰歿矣以所藏書籍及前所著書來目以秦小峴司寇書屬爲校刊雖老且病不忍辭董君等復以墓志請謹就行狀紀其崖畧焉生諱經字景辰荆溪徐舍人祖某祖母呂青年守志生爲請

旌父魯母陸亦早寡奉嫗姑以節孝稱格於令未得旌

余嘗表其閭及卒又志其墓生家素薄世習生業生幼
獨志讀書尤喜句律師邑中詩人萬之蘅張衢黃中理
佳者或過其師自十九歲設塾於梵覺庵至晚不倦以
脩脯供母甘旨得其驩心母年七十有五乃終性嗜古
義而好著書余樹國山碑石亭後趙大令曾重修生與
有力他如建文定橋設樓流所同仁會義冢皆竭心力
忘其貧尤篤於師友不憚千里命駕相與登山臨水暢
所懷來傾貲置書籍以資攷證故能詢度蒐采著作等
身荆溪爲宜興分置置內國山蜀山善卷洞崑崙溪皆
詩境也生其鄉者名山水之孕毓耳目之濡染耆舊友

明之熏陶自得清淑之氣發爲和雅之音生居市廛而
能恬忽名利以纂述爲性命有以也其書自續太平廣
記外已刻者碧雲山房詩集雙溪物產疏未刻者荆南
碑刻錄荆南小志九子山行記百四十齋記寒庖錄古
文書跋尚如千卷生旣終母喪秋夜讀書忽見赤光滿
紙嘆曰此一片心血也尋患疽發背而歿時嘉慶二十
有三年秋八月年五十三歲有女子子四人皆適士族
無子以從姪萱爲嗣葬於青隴山祖塋側銘曰

艱於養資修進之濡於書竭身殉之書益富矣家益窶
矣不刻不行雖死不瞑嗟余老矣勉一諾以慰爾靈爾

其安貞

陳君一治下布衣耳窮愁著書質志以歿先生爲志
其墓且捐重貲刻所撰續太平廣記三百卷行世憐
才好士及於死者求諸古人亦不多見

持謙記

國子生車君暨配朱孺人墓志銘

改鑑兒作

君諱士暘字東谷姓車氏江南上元縣人也先世爲吾
楚邵陽望族自君曾祖給諫公萬育納祿僑金陵而卒
恭逢

仁廟南巡君伯祖太史公鼎晉迎

鑾被

旨垂詢給諫

命葬江寧遂家焉君祖鼎賁給諫第四子也其子新爲
君考娶江都鄭氏生君幼而敏於讀書精經誼史務窮
理致用不屑屑科舉業有兄早逝慮以室家衣食計累

其大人乃出遊當事藉羔鴈爲旨甘雖素困乏養自豐也雖有離憂志自樂也君爲人頎而龐美髭髯端樸寡言笑及論古今治忽處事當否洞如指掌詞又足以達之以故歷遊吳越齊楚間諸大府無不敬信爲古君子爭致書幣用其謀興善政決疑獄有仁明聲君性惇篤居父喪哀毀瀕殆母疾亟君在邗江聞之戴星而還母絕而復甦者再人以爲誠感其世父鳳來無後君養之如父嘗問持身之要於鳳來曰在謙謹君以名其二子志勿諉也於族誼尤厚贈卹不遺餘力聞從孫婦王割股療夫疾自山左寓兼金以獎之其重倫紀類如此少

長於文菰金石篆刻逼近先秦老而置之著有歷下西湖蘇臺邗上諸游草抒寫性靈雅不樂以詩名配朱孺人校官鶴女鶴娶於車孺人於君爲中表行于歸事翁姑善承志君客他鄉如君在側淑躬和慎訓子成立有方持家政織紉組紃酒漿井臼皆任其勞年五十偶吟咏適懷自暑味飴老人然祭祀必虔被服必潔戚鄰饋遺必周至不以衰退踈其節故君遠遊無內顧憂君國子生以嘉慶辛未年七月卒於泲寧官廨年六十有一孺人長君一歲後君七年卒於丁丑年六月年六十有八子三持誼蚤殤持謙邑庠生娶桐城方氏繼娶錢唐

袁氏持謹考授從九品職居母喪未六十日而歿娶同邑王氏女一適郡學生戴衍祥孫一志葵持謙出持謙有行誼工文辭爲名諸生與余善寓書都門將以某月日合葬於某山之原屬爲之銘曰

役其躬兮優其親蓄諸已兮輸諸人雖離家兮遠邁差樂道兮安貧有內助兮代娛親之昏晨有賢似兮且鬱而伸魂兮歸來偕幽魄以全真

先君子多遠游不及見先生先生此文就謙口述所稱君爲人頌而癯數語宛然先君子情狀所謂頰上漆毫得其神似也先生又爲亡弟子讓作印譜序具

載集中一門德藝得先生以傳其銘感當何如耶
持謙敬識

長兄鞠谿先生墓志銘

兄姓唐氏諱家謨字玉林號鞠谿生乾隆癸亥年九月
癸巳戌時越嘉慶戊寅年四月戊子寅時卒於就養龍
潭司官舍春秋七十有六唐氏自唐莒國公後屢遷至
江西豐城明永樂年榮琛公徙湖南善化湘潭兩邑
間數世皆反葬隆萬中興秀二公一家善化一家湘潭
興公吾祖也廬田心橋葬師子山遂爲善化人閱三
世丁明季寇亂幾無子遺高大父信甫府君匿山洞
獲免生五子爲五大房曾大父公錫府君正八品妣
劉孺人大父棕舟府君太學生

贈奉直大夫妣彭宜人 先考石嶺府君乾隆辛酉
科舉人山東平陰昌邑知縣

誥贈奉政大夫妣李宜人早卒繼 譚宜人生吾兄弟
三人長兄次仲冕乾隆癸丑科進士江蘇候補道署按
察使次佳駒布政司理問先卒自高曾至兄代爲宗子
勝國兵燹譜系失傳興公以後世諱可考而行誼莫詳
高大父始以偉人碩德濟險啟後 曾大父方嚴爲
鄉閭望 大父好儒術樂施予量廓如無不容 先君
潛心理道著今文尚書四子書訓詁及詩文集居官有
惠績民尸祝之世積懿行以至於兄孝友節儉不忝前

人 先慈氏嘗邁疾暴絕兄尚幼急呼數百聲乃蘇
先君之喪兄衰且疾猶終三年不飲酒食肉人以爲難
讀書早惠日誦千名九歲屬文夜成十藝屢舉不第教
授里黨仲冕少時從之受經及通籍治民迪以廉平毋
得罪百姓牧通州時恭遇

覃恩貤封奉政大夫著小學續編二卷行世嗟嗟吾兄
恪承庭訓學有原本旁及九流皆可施用而阨於遇賁
志以終鬱久當發其期諸後昆乎配柳氏

貤贈宜人子五長錯句容縣龍潭司巡檢娶師氏次鈞
邑庠生娶游氏繼堂伯家瓚後次錫監生娶何氏次銳

娶宋氏次亮原署婺源縣項村司巡檢娶黃氏銳亮先
卒孫六瀛邑庠生餘俱業儒曾孫一椿幼是年九月其
孤錯等扶櫬而歸葬先人之原銘曰

昔吾與兄同遇仙乞蟠桃核種東園種之五十有三年
山桃未發兄大還還與羣真采實餐阿弟獨盼花枝繁
宦蹤無日不隨肩兩月不見隔重泉種樹成陰歸故山
看似平平寫去結構却嚴而正

持謙記

孝廉蔡仲蘭妻夏孺人墓碣銘

嘉慶己卯歲孟冬月吳縣蔡生成輅將以父命葬其母夏孺人於縣十二都母棠字圩西山村祖塋之東來言於予曰先生旣爲吾母氏傳矣今葬有日例合碣於墓請更爲之銘予因攷其家行略而備記之孺人姓夏氏名蘭貞吳縣人同邑辛酉科舉人蔡君復午之配也父似麟母許生母吳兄寅官山東令年十九歸蔡年五十有四而卒生乾隆三十年四月二十二日卒嘉慶二十三年十二月二十五日子男六人長成輅太學生婦吳次彥婦施次公輔婦周次踵武次鴻次應甲皆幼女三

人長德適震澤附學生蒯逢恩次言適平湖楊鼎年次
容未字孫男二人濟定公輔生孚嘉成輅生孺人奉姆
教佐夫子事尊章持家課子皆竭誠以協義有鍾郝風
既詳諸其傳爰櫟括而銘之曰

教成牖下齋季尸之侍嫡婉婉食飲精治于歸孝養翁
豫勝兒兩叔幼小鍾愛於姑曲承厚撫堂上歡娛偕奉
枕扇佐習詩書兩遭親癘衣不解帶褊窳經營雖貧弗
懈前後十年責無旁貸慎終必篤迪後維臧宦學方殷
兒女成行以育以誨無怠無荒堂室灑埽門闌鍵鑰書
躬并白夜紉履襪總角倍文一燈共灼既領鄉書益賴

家壺遊者橐筆居者空困瘠而鄉義自忘其窘授室相
攸辭無不腆稗當就傳親訓編簡義方有成不在登選
精力旣竭怛焉終堂皋魚血泣奉倩神傷族姍隣嫗周
卹難忘同聲感歎慈竹凋霜劬躬以燾嗣世其昌告爾
彤史視茲銘章

竭誠以協義是先慈一生作人處先生特爲揭出成
輅兄弟等泣感靡涯矣

成輅敬識

賜同進士出身翰林院檢討兼充三通館纂修官余公墓表

公諱廷燦字卿雯姓余氏湖南長沙人也以學行爲世宗仰晚號存吾學者稱存吾先生考諱某初

封文林郎晉封儒林郎妣陳氏初封太孺人晉贈安人儒林棄產課子築詒穀草堂購書延師聚公兄弟三人誦讀其中知公頭角崢嶸性絕穎異必爲傳人未幾草堂燬公兄弟皆廢書公乃走四方與諸名流相研究年二十五登癸酉科賢書辛巳

恩科成進士改庶吉士聞儒林疾乞假省覲例京察年

不准假歸梁文莊詩正專奏奉

俞旨歸侍醫藥者四年儒林卒公哀毀盡禮戊子年入
都散館授職檢討充三通館纂修官辛卯年聞其兄
沒其弟已先逝母年七十有八侍養無人迺引疾而歸
歸而田少食指多則藉東修爲仰事俯育資主講城南
書院多士景從及丁陳安人憂執喪一如儒林禮因患
臍噎不復作出山想矣又十年恭逢庚戌八月爲

純廟八旬萬壽當往祝

釐復人都至其年九月仍乞假還里主講石鼓書院論
學益精詣越戊午二月卒於里第士林悼之公學有根

抵力敦六行雖貧約皆能行其志以本身應得

封典

貤贈其兄嫂與宗祠培遠墓立祀田墓田撫兄遺孤四人婚嫁成立館其弟遺女之婿於家而以儒林遺業三分之一推與昆季承儒林志經紀其從父兄弟無缺乏其隨分推解戚鄰無閒言篤於友誼以講學爲宗故撤瑟之前辰猶有答余習園慶長論學書千餘言不倦也其發爲文辭也原本經籍隱括濂洛關閩性理微言及諸子百家象緯勾股律呂音韻之書皆提其要而納之軌物自謂神明規矩吾得安溪蓋紀實也制執以古文

爲時文鉅人長德咸推許之傳誦徧海宇遊其門者治經有法取科第如摘髭耳惜夫退處日多未得膺衡文之任也公生雍正十三年卒嘉慶三年年七十配周安人後公五年卒年七十有四子三人永賢乾隆丁酉科副榜舉人今平江縣教諭邵賢己酉科拔貢壬子科舉人正黃旗覺羅官學教習京賢孫若干人曾孫若干人昔先大夫與公爲執友永賢嘗執經問業仲冕於乾隆己酉公車謁公春明質以所著周禮岱志及以禮闈三藝請則曰胷中有書筆下無書惟溥博如天淵泉如淵題文周天三百六十度所渠千七百一川二語爲警策

耳果報罷尋奉諱返公亦還山及癸丑通籍率絲吳中
改訂岱志爲岱覽先付築氏周禮至今未成書而公與
先大夫先後歸道山矣嗚呼道光二年冬永賢自岳州
寄書來得讀公文集并示書仲冕癸丑闢墨後一篇益
仰公之厚於執友而期望小子之深也永賢以行述屬
爲之傳雖弗文弗敢辭謹序次而表其墓云

信手鋪叙自然成章所謂鴻文無範也

持謙記

祥孫墓志

祥孫者余次子鏌之長兒名爾益小字祥冠母甯氏其
大母之姪也九歲失母與其弟桂冠育於大母祥孫生
而秀弱不勝衣或終日無言笑而喜讀書初上塾授易
能成誦近則詩書禮記左傳俱卒業矣屬文務求意義
質非超異專篤自憙遇文學士叩請無已於外間世事
一豪弗解獨孝友夙成余家居每日向晚必偕弟自塾
來倍書及所著文或屬對以爲娛樂弟或遺忘則代答
巧飾之平時撫其弟尤有人所難能者病危篤時其父
口得嚏可活得汗可解孫聞之卽以辮髮自刺其鼻而

噫又於被中搓手略潤以示曰汗矣屬纊之前日向其大母流涕不能拭竟以己卯年正月二十有三日歿年十有七歲余爲大父廼因疏江于役海上未及省視沉痛何言於禮義合勿殤將以成人禮祔葬於其曾大母妣西之塋先爲之志孫生於嘉慶癸亥年六月八日是日妣西塋前樹表以爲祥也故曰祥冠孰知其天而殯於斯乎人或謂其生爲祥而卒不祥也其大父泣然曰吾孫祥也有祥德者四焉至性過人仁也笑言內闕敬也誦說弗懈勤也耆欲未興篤也仁敬勤篤以全其天而歸其真祥孰大焉彼無此四德者爲罔之生祥哉祥

哉

模寫細事曲而能達是先生擅長處

廣平拜讀

詩人寧鄉縣學生何君墓志銘

余年二十八遇何君星田於岱下明年余主泰山講席
君教授泰安縣公衙齋數常過從以文學行誼相切劘
重以婚姻著有柬理齋唱和集及君歸省余爲賦別且
序以送之後十餘年余宰江南延君課讀久之病目歸
雖數千里外無歲無詩筒往還嗣君寅來訪讀所著詩
筆喜其健在不意前年愕聞凶耗寢門一痛宿草長悲
傷直諒多聞之友不再覲也今寅以狀請銘其墓謂君
遺言惟陶山知之深始克傳之余何敢辭君名同余家
諱贈荅常以字行謹案君字星田號梅莊長沙寧鄉人

也縣學諸生生乾隆辛未年正月廿五日卒嘉慶己卯
年閏四月廿九日年六十有九其先曰德明者自新化
徙今縣曾祖其淵祖中瀚父大榮母氏廖兄四有炳有
焜有烈有典先世頗饒于財以君父好施予而貧君生
晚無乳和麵哺之長而羸多疾然好刻苦讀書敦行孝
弟年十五授徒鄉曲以修脯佐其兄養夜難綫香照字
默誦庚子居父喪哭泣過禮目眩昏時有炳客泰安君
往從之應黃明府之聘癸卯歸應鄉舉結茅羅俊坡事
母課子乙巳有炳歸天倫樂聚菽水蒸藹驩如也乙卯
一遊吳門尋以母老辭歸庚申居母喪哀泣目益眇時

有炳先歿教其孤應燧入邑庠徙宅梅莊閉戶著書而
諸兄皆逝傷痛遂至失明有展墓詩云諸兄如夢歸青
草季子澆山又白頭君養醇學粹尤邃於詩扞寫性靈
扶持風教其於事親從兄交友接物與夫悲愉感慨一
發之詩悉出以和平而無憤懣嗔曼之音丙寅刻梅莊
詩鈔編邑中耆宿諸作爲玉潭詩選爲邑大令謝公青
莽校刻翠圍山房詩集皆爲名流稱許君晚年不能視
少時所習卷軸無一字忘讓著述尤富口授兒曹錄稿
幾欲脫腕有以文彙就正者命其人讀一周逐句指點
改竄賊中繩準從遊者益衆爭取其稿致多散佚尚有

梅莊古文梅莊家訓藏於家君配諱氏子二人鶚娶胡
寅國學生娶談繼娶賀女適余兄子國學生錫次適廖
季字趙孫二承錫人鶚出承鏞寅出以某月日葬於某
山之原銘曰

品如緝芷文如佩瓊殫挫其采又黜其明不見塵坱斯
見精瑩卜子遺教水部嗣聲潛窺道妙獨得詩清古高
士傳視此佳城

不見塵坱斯見精瑩請卽以篇中二語轉評此文
平拜讀

贈太子少保侍郎岳公行狀

公諱岳起字小瀛滿洲鑲白旗人姓鄂濟氏父長庚仕
主監察御史公年十五補諸生中乾隆辛卯科舉人由
方略館議叙筆帖式存歷戶部員外郎翰林院侍講學
士少詹事奉天府府尹轉閣學出爲江西布政使因疾
假歸嘉慶四年起復山東布政使尋升江蘇巡撫八年
入覲以疾留京署禮部侍郎尋解職閑居而卒被
旨加贈太子少保銜照侍郎例給卹典公自少讀書制
行刻苦堅忍久而自然畢生無市名心弱冠侍御歿家
赤貧事寡母甘旨無缺以孝聞讀四子書必心會身體

有所發明嘗謂學者當守乞人不屑之義爲京朝官雖
賀賻不受外任則俸養廉外不名一錢勞儉若性成人
見爲困乏者適適如也至其爲政則盡心力以爲民不
以潔已爲稱塞故尹奉天革放糧陋習使瘠民腴已者
絕其根株及藩江西大水壞隄公乘小舫冒暑救之幾
隕於湖其巡撫江蘇也首奏肅清漕運揭倉場漕丁需
索回漕諸弊爲州縣浮收藉口請一切嚴禁
上嘉納之及兌運事竣

廷寄今年清漕惟江南辦理最妥時仲冕率吳縣擇米
燥潔平斛響概民丁帖然及運艘還次詢之以爲沿途

抵壩一無問者非惟無折耗且有贏餘緣寒納暄出粒米王張也揚州富安場商請開東臺范隄洩水公示禁之大略言范隄東竈地西民田高下相懸豈可將瀉鹵洩入民田又云竈地之水祇可歸海范隄宜培高而不宜設壩啟閉六年因邵工漫溢河淤堰塌奏借帑浚築河堰以資保衛俾毛城鋪迤下洪滅諸河及天然厓下河道皆無壅閼七年淮徐海偏灾請賑公一騎一僕馳往檢察戶口及口米折錢數無遺濫無浮減是歲大寒河凍公循北岸不得渡屏厨傳日於馬上餐餽餽數枚歸而寒疾作矣明年竟以是疾終然公赴民難阨雖身

殉無悔也公性慈和廉而不劌不言而躬行僚下化之
爭相濯厲苞苴自絕倉庫漸完吳俗繁華公韋帶糲食
出無騶從示之以簡其風丕變尤嫻於禮樂謂江南聲
明文物當講肄律度期臻醇雅暇則詣學宮召師生咸
集親爲容以導之禮器樂舞備物合節上丁奠獻必蠲
必虔

朝賀慶祝諸儀仗悉如品式登降必謹觀者肅然公身
通六藝射必命中書法亦道勾股象緯籌海治河戰陳
諸法皆精通扼要爲專家所不及其取人雖一長必錄
篤於友誼凡少年所交遊公旣貴雖布衣視之如舊時

卽人亦視公如舊時也詩古文詞濡筆卽成而用意深
遠惜無存藁

熙朝雅頌集載有秋江晚泊詩云不知疎雨過便有十
分秋短夢迴孤枕新涼注淺甌塘風上衣綠林月勝鐙
幽鰕菜明朝買前村蘆荻洲讀之可以知其襟度矣公
生於乾隆十四年己巳卒時年五十五娶葉赫那拉氏
盛京禮部侍郎溫福女先公卒繼娶他他拉氏鐵柱女
公之卒也

上旣軫念督撫中最爲清正贈且卹之又因其無子族
無可繼將所遺祭田五十六畝五分歲入租錢交伊孀

妻爲祭埽修墳之用俟其妻歿後照例入官

德意至厚今其夫人銜戴

國恩恪守公志不媿爲廉吏妻是爲狀

只就少保公數大事從實寫出無溢美無泛辭燕許

手筆也

持謙記

禮部右侍郎安溪李公郁齋先生行狀

仲冕弱冠客畿輔占貫潞河補博士弟子員第一閱試牘有風流雋雅援据精切讀經至此可謂融貫之評其時督學使者則安溪李少宗伯郁齋先生也已而謁先生於京邸瞻其貌粹然清且厚聆其言藹然以和肫肫焉述前聞策後學期以遠到明年舉京兆猶一再見之禮闈報罷改籍南歸及重至春明先生已歸旆清溪今將五十年矣辛巳夏奉

命陳臬閩中至則急詢其後嗣而先生之孫志萃志菴取應鄉解以其父選貢生維廸書來錄先生行實屬爲

之傳謹按先生諱宗文號郁齋姓李氏安溪文貞公大學士厚庵公之曾孫文學允亭公之孫少宗伯穆亭公之長子也先生幼能屬文發明經義紹衣先業辛酉舉於鄉戊辰成進士入詞館皆本經術爲文上膺

主知壬申典試粵東癸酉順天鄉試分校丙子典試陝西督學河南壬午復分校順天乙酉典試江南辛卯督學順天丙申扈

蹕津門閱

名試詩賦凡試士衡文之任殆無虛日所得士皆知通經爲要翕然從風其歷官由編修洊歷左庶子充會典

館纂修旋補中允遷侍讀少詹事內閣學士充會典總裁補禮部侍郎工部侍郎署兵部侍郎卒授禮部右侍郎兼樂部皆清華典要之選

國家有大禮儀措正施行悉中楷則蓋由經術湛深嫻典章正文體纘戎祖考一如伯夷后夔之在虞廷輔成一代文明之治夫經者前聖微言大義所存士君子修己治人信今傳後不外乎是文貞公遠紹濂洛闢閩之學此物此志也先生少讀書得穆亭公驩心賜以文貞遺硯其後督學淵江

純廟諭以閩浙水土相近爾母年高正資迎養

大聖人錫類之仁足徵孝感至於撫庶弟仲季而優以
田租敬宗收族封樹兆域於讀禮中力修子弟事則六
行克敦端自經術中來仲冕猶記應童子試時旣錄名
覆考招諸生環列几按指試牘中溝洫金鍾諸說疏證
詳朗由名物象數以達於理道性命之精無非闡文貞
公榕邨諸書及宗伯公試浙講義之遺訓惜乎年已耄
及訖不能窮經致用以副遠期良用自愧

國史法當有傳其爵里宦蹟支系具詳諸公碑志謹書
所親炙而景行者付之後賢有餘慕焉

詞氣端凝筆力振拔益州謂老蘇文似子長謙謂此

文又過于老蘇

持謙記

詩人盛百堂小傳

百堂盛氏諱元灝少時工制舉業補博士弟子員蜚聲庠序間性冲澹不以科名得失縈懷惟喜爲歌詩以自娛晚歲益肆力於詩古文辭往余宰奉賢時百堂過從相酬唱爲余題硯覽圖和縣齋四詠余以是知其爲人其詩之翛然塵表有由然也百堂生平敦氣誼重然諾從事心學得揚慈湖孫夏峰之傳治刑名家言爲人判牘一以崇倫紀厚風俗息爭安良爲要往往發之於詩初遊閩海往來吳越履綦所至凡羅浮天台匡廬衡岳諸名山洞庭之廣三峽之險號爲東南奇偉形勝之區

與夫中州嵩河之壯觀罔弗流連攷證拓其神智因以
交當世之賢人君子相與陶寫性靈發摠道妙故其詩
溫厚和平得風人旨趣所著宜齋詩鈔年愈劬而境愈
超所謂得江山之助老去漸於詩律細也百堂年七十
六而卒其子鑑華能繼厥志述其行事甚悉余與百堂
以詩訂交故綜其得力之由而爲之傳云

贊曰或問操筆爲句律風雲月露遂謂之詩人乎曰非
也夫詩者所以持人性情而有裨風教者也若川然有
源以迎浦而後大百堂妙契心性言行皆和而康隨事
利濟而後有此正始之音嗚呼詩人豈易言哉

熟讀此傳可悟作詩之旨勝披鍾嶸廿四品也

持謙

記

節婦蔡黃氏行狀

湘潭蔡孝廉銍以其族母黃氏節孝梗概丐余論次以傳謹按黃氏吳縣黃家堡人生而孝勤及笄適蔡正聲正聲患瘵娶四年而歿黃時年二十有四一慟幾絕以舅姑在子纔三齡不敢死家貧辟蠶飼蠶以供菽水無缺乏又十餘年舅姑相繼歿喪葬成禮子廷栻旣成立服賈荆湘黃爲聘秦氏又遭殷氏凡十餘年無所出黃日夕拜禱祖先以縣夫祀若有神告之者殷連舉三孫黃乃喜家亦漸豐則以其所有助宗黨喪葬婚嫁無吝色卒年七十有一銍原貫蘇州之洞庭山於節婦爲族

從子云

文之佳處全在一真侈爲鋪張無益也

廣平拜讀

節婦唐蕭氏行狀

節婦唐蕭氏者余族子孝廉業謙之曾祖母也節婦爲邑諸生蕭孚昇女適邑諸生唐超韓超韓以勤學早卒節婦年二十有四欲從死閉戶自經其母李覺之毀門解救旣蘇勸以子方在抱撫孤重殉節輕節婦乃收涕茹藥撫育其子若孫讀書敦行躬自操作勤約一裘十餘年不易補綴重疊曰吾以惜福也撫陳氏姊孤女配名門歉歲振卹貧乏鄰有數日不舉火者夜遺餽米其家卒年七十有六子浩與淳承節婦志皆自毀其家延師課子不遺餘力今業謙昆季少有奇童目長爲世知

名士節婦卒後二十餘年浩旣請
旌建坊書其節概以示余余喜亢宗有人而柏舟之
流徽不可忘因叙次其行狀云

孝廉不久卽成進士今且爲尚書郎有聲公卿間亢
宗之語信有先見

持謙記

節孝項范氏行狀

項范氏長沙寧鄉人年未笄歸項生某閱二年舉子而
殤生病且死謂范曰吾爲長子請弟皆幼吾死誰事二
人且子又不育范泣曰儻有不諱誓當代夫事親撫立
後嗣生卒范慟欲絕念夫遺命強起奉尊章其父謂青
年無子守節最難勸之改適范乃剪髮焚夫靈主前以
明其志舅姑喜得冢婦子天如忘又二十八年有姪可
繼乃請於舅許之於是爲夫營祠室親抱嬰兒拜於祠
哭曰夫子其可瞑於地下矣宗黨見者無不感歎泣下
舅姑相繼以天年終持冢課嗣旣豐以賢夫弟國燦將

如例請

旌而以其事實丐何生雲驥乞余爲傳因狀其梗概如此

贊曰孝經云身體髮膚受之父母不敢毀傷今范氏自剪髮焚告浮議遂絕不媿其言四十年如一日是以毀爲完也婦行且然然則士不發憤茹苦惡能皎然垂耀哉

以毀爲完立言有體

廣平拜讀

節婦袁何氏行狀

袁何氏者寧鄉袁禹瑞之室文學何星田之姊也年十八于歸二年而寡痛絕欲殉之因有遺腹強治夫喪越五月誕男矢之曰吾之死生繫此藐諸矣兒善病頗死者數氏泣籲於神百計勤閔幸而無恙家貧無生計歸寧母家紡績鍼黹爲修脯資督兒就傅嚴動止以有成立及兒婚後生齒漸多乃出十數年所蓄稅田耕作以自給迨鬚鬢白髮圍蔬畦秫猶躬率兒孫薊灌夜則篝燈爲孫女輩作嫁衣蓋七十年如一日也氏幼小女紅之暇嘗手輯古今賢媛貞婦烈女爲一卷命曰女史每

錄殉節諸傳則歔歔涕洟不能自己嗚呼豈非其天性
然哉

澹澹著筆悲愴動人

持謙記

旌表節孝萬母蕭氏行狀題辭

歲在己卯長夏清河拔萃科萬生鏞屬其友人以其母旌表節孝行狀乞題余方權河儲觀察誼合表章因爲之辭曰壺行以孝節爲完品品原於性而成於志志不立性雖善弗完也性善而志立而學存乎其中矣若萬節母者豈非性志兼篤爲品之獨完者歟其孝也在室則割體以療其父守節養舅則以婦代子曰勤鍼黹以供甘旨親滌滌帟以待湯葯酷暑未歛汲井泉爲夷盤採柳條爲蠅拂病軀支離瀕死弗卹卒能喪葬如禮其節也殉易而守難殉則慷慨從夫無餘事焉守則寢室

窮發仰事俯畜一身肩之終身未能了之於是忍死事
存飢寒水蘗既葬其舅又育其孤且及其從子從女以
報所天使死者復生生者不媿其言非至性過人立志
較然下欺其素安能處困而亨數十年如一日哉吾以
爲遇變竭才從容中節與古列女相符合卽其學也夫
志以全性學以行志何必章句論說而後謂之學乎今
其品行旣由閭史游達春官建之綽楔萬生秉母教登
科目又徵鉅人名儒傳贊爲管煒集而母德章矣萬生
賢乎哉念母奉六十有四歲之衰翁有所終則知性端
之當充念母撫百六十五日之藐孤有所樹則知養志

之常慕念破屋寒鐙綴衣課讀之勞單衾短榻戰瘕汗
漿之苦則知勤學之不敢寧處性節母之所性志節母
之所志而爲遠大之學求志達道以榮其親若陶士行
歐陽永叔其所表見亦皆性分中事耳萬生勉乎哉貞
遇爲志式古爲學表風化爲品女之有士行者卽士範
也余故樂得而稱道之

壺行數語是彰女行亦以勵儒修也當細心讀之持
謙記

書富平縣貞婦溫王氏事

女子以不字爲貞適人爲婦貞何以曰婦成女志也何成乎女之志女將使溫氏翁姥無孫而有孫曷爲使無孫而有孫也嘉慶戊寅歲女年十三許字隣村溫氏子溫氏子年十五儒而賈以養其祖父母是歲遭疾而殤女父母爲其幼也匿不與聞而女聞之審則急奔赴喪其父追之返舍里婦羣笑之村先生且非之女於是侘傺懷慙時飲泣自言溫氏翁姥年七十餘一孫今殤矣我女而不婦則翁姥無孫而絕且無人養我往爲之婦必擇嗣則翁姥無孫而有孫生有養而死有祀也於是

葬有日矣女乃乘間匍匐柩前哭盡哀拜見翁姥稱孫婦翁姥以家貧而女年少辭女泣曰願終身矢靡他旣葬家人挽之不歸寸步不出溫門越三年如一日於是鄉老閭史上其事於邑尹尹上之郡郡上之臺省莫不咨嗟嘆異以爲未及旌年先表厥宅且慮其奉養無資相與醵金置田如千畝取其歲入以供衣食於是溫氏翁姥老有所依且立繼嗣而溫氏子亦爲不死矣使女而不婦曷克有此故曰貞婦者成女之志也貞婦富平木節口村王生輝之女科子村溫振邦與妻袁氏之孫繩武未婚之婦也皆鄉農爲貞婦故并識之

先生喜傳人節孝西安下車後聞王氏女守貞事卽
捐金賜額以表其門並撰此文勒石碑林以垂久遠
持謙記

勅贈修職郎上元縣教諭汪君墓表

贈君諱榕字蔭千姓汪氏安徽歙人曾祖士連

誥封奉政大夫祖遜卿廣西泗城軍民府同知父澧太學生家故饒於財泗城勤事卒於官太學年甫十四扶櫬遠歸囊橐罄乏君生而穎異天性過人孜孜以先正格言爲服習念佔畢不足以治生無以供甘旨適以爲謀必忠與交必信爲桐城程戚司會計凡質庫之權子母覈出入必以一人爲綱領得其人則貿遷輻湊財無漏卮不爲怨府君以識度勝故數十年如一日太學隱性邱園克享高年由君能養志也君讀書有卓見遇義

必爲急人之急無吝容亦無德色微俗溺青島家言有
覓風水久而弗葬者君擇土卽定雖旁屬無懸棺其先
人舊屋十餘所質於他姓君悉力贖還之曰前世締造
之遺不可棄也族黨姻婭之貧窶者不恤委曲代謀俾
衣食有資而後已君史學最深書法歐陽率更而不欲
以文藝自炫常慕武林山水愛誦坡公湖上青山翠作
堆之句晚年自號翠堆從所慕也卒於乾隆乙巳年七
月年七十有七子二焯國學生先卒焯嘉慶庚申

恩科舉人上元縣教諭道光元年

覃恩贈君如燁官配畢氏洪氏程氏皆封贈如例孫

四人曾孫六人道光四年燁以行狀求論謨其美因序
次墓表且爲之銘曰

越公奕裔絜代蕃昌獨抱隱德忠信是將親以怡壽家
用吉康養潛弗耀積厚彌光式恢世業茂發書香報以
嘉祉
錫之綸章表茲兆域後嗣延祥

誥授朝議大夫山西蒲州府同知公舉名宦陳君墓表
君諱世昌號藝菰湖南武陵人也曾祖諱其治祖諱瓊
父諱天祚君未十齡父母相繼逝偕弟世俊養於叔祖
母胡幼而好學年十四補諸生旋食餼應拔萃試以胡
疾篤辭不與明年辛酉舉優行第一領鄉薦屢上春官
不第考補國子監學正充戊辰科鄉試內收掌官遷博
士歷祿米倉儲濟倉監督廉靖綜覈吏不能欺國博報

蒲引

見記名選蒲州府同知蓋其踴躍塲屋者十餘年迴翔
京秩又十餘年始以司馬佐郡人或惜才屈於遇君則

謂士特患不能其官耳何必顯位於是敵勉教化竭悃
忱而施之既下車知民苦獄訟久懸一歲之中剖決七
百餘牘創建條陽書院設學規膏火多士雲集修永樂
鎮文廟遵行丁祭生儒習禮其中助寒畯赴省試之艱
於貲者皆蠲奉爲之導人樂從而成其美玉溪澗久淤
率民疏濬躬親其勞渠成而資其灌溉者數十里禁民
爲優翦其強猾任育兒等十數人奸宄斂跡民有貧而
滯喪不葬者諭而俵之有拚骸埋齒之風山有狼爲禾
稼害禱於神獵其二磔之而害遂絕及權監掣嚴治私
販修涑水河渠商賈胥賴凡有關於民生利病必興除

有成效乃已當盛夏旱暵君步行數十里至雙泉觀及諸神祠虔禱得雨平地尺士民以惠我無私頌之而君卒矣君卒於道光三年十二月六日年四十八配氏戴丈夫子二慶基慧基女子子二君卒後蒲郡衿士臚其政績舉名宦蓋三代直道之公也日余官江南牧守君自京師寓書詢爲政之要承上接下之道何以與古人合則其究心經世之學久矣著有親雅堂詩文如千卷乙酉夏其孤慶基乞文於余因約蒲人所臚陳者而爲之表

誥贈奉政大夫翰林院侍講太學生朱君殿之暨配
贈宜人胡氏繼配

封太宜人五世同堂趙氏墓銘

道光五年乙酉夏涇縣朱贊善琚將於某月合葬其本
生考妣於其縣之某原以行略乞銘於余余謂禮典出
繼子降服於所生之親仕者必丁憂治喪誠重之也往
余報最入都琚出雪夜綳兒圖索詩緣琚初生多夜啼
其父奉政君方卧疾母趙太宜人慮擾病者眠三更冒
雪懷以適比鄰節婦賀又因切近姑室則復綳之而返
余乃歎趙太宜人之賢孝而琚毛裏之愛爲罔極也謹

按奉政君諱安邦字殿之其先自婺源遷涇之黃田祖
諱武勲公舉鄉賢入祠以曾孫理貴

贈贈通奉大夫配汪氏

贈夫人父慶霄太學生鄉飲賓亦以孫理貴

累贈資政大夫貴州巡撫配胡氏

贈夫人君貌清癯性英敏習儒業能詩工書爲兄安沆
有羸疾次兄安淮弟安桂先後歿堂上甘旨不足迺棄
儒服賈用孝養厥父母安桂卽珩所後之親也少穎異
讀書勞瘁君友愛彌篤及縣愜君握其腕曰弟如不起
當擇佳兒爲弟後哭之慟甚越九年而珩始生彌月君

已疾亟熟視之謂趙太宜人曰吾恨讀書未成名是兒必能承吾志惟弟亡時吾有成言今弟婦守貞俾嗣之與他日顯揚以慰幽魂以勸苦節請於資政公夫婦皆然之出繼六旬君遂卒君孝養必竭其力友於兄弟死生以之迨珥膺

封典所後與所生皆被

恩榮而君志願始得遂於九原也自君卒後五十餘年家政日理子孫曾元成立蔚起則趙太宜人勤儉雍睦善承其夫子之志所致君元配胡宜人早卒遺一女趙太宜人視如已出待所遺老婢雖別居猶恩及之教子

必以義方戒與鄉鄰爭務治比退讓性均一凡公家布帛麻絲蠶蕘之屬分部咸服其平自喜操作精潔整齊有割肉必方斷葱以寸之風然檢校凌雜而惡苛細服御儉約而好任卹今於卒後合議建豐備倉峙粟以濟荒歉遵遺命也先是丁丑歲珩以嗣母年例陳情拜疏雖出繼子無告養之條亦聲明疏中蒙

聖主召對垂詢兩母年狀宣溫諭趙太宜人親見五代珩牒院長請旌亦蒙

俞旨記云婦順備內和理而後家可長久此

寵榮稠渥之所由來歟奉政君卒於乾隆三十五年正

月六日年三十有三胡宜人卒於乾隆二十五年某月
某日年二十有二趙太宜人卒於道光四年閏月二十
日年八十有三生丈夫子三長琛布政司理問以琦階
貤封奉直大夫次瑄布政司理問亦以琦階

贈奉政大夫皆先歿次降服子琦嘉慶壬戌科進士右
春坊右贊善前翰林侍講俱趙出女二長適太學生胡
世琛胡出次適胡世咳趙出孫男十二承重孫坤元州
同知第元太學生培元琛出悖元太學生贊元邑庠生
恒元憶元瑄出降服孫夢元太學生鼎元附貢生蔚元
起元邑庠生葆元琦出孫女十二曾孫男十七曾孫女

十四元孫男四元孫女三子姓蕃昌福德兼至法當有
銘琿以乾隆甲寅舉於鄉余分校所薦士也誼不容以
衰老辭謹序而銘之曰

紫陽近系方軌儒門乃祖積善嶽嶽鄉賢五子同宅聚
星堂尊堂右吉壤君創崇垣力疾盲構成室美輪顏曰
思永以啓後昆釐爾女士夫亡若存子又生子孫又生
孫克揚前志長沐

朝恩穀暎空合鞏固且安保世滋大安此刻文

誥封夫人元配寧夫人墓誌銘

并敘

夫人姓寧氏湖南善化人乾隆壬申科舉人江西九江衛千總諱廷選之長女先大夫爲諸生時與其伯父肄業嶽麓書院以文章相友善因訂姻年十八於歸奉先太夫人赴先大夫平陰官舍舟由長江運河數月風濤隨行婦嫗多嘔臥獨夫人侍太夫人怡怡如平常明年太夫人見背時屢顧夫人爲之點頰及太夫人葬陶山先大夫解組挈家歸里獨就夫人養飲饌必手治雖山居所嗜食物必預儲待余旣登賢書教授岱下近墓展埽閒歲一歸省薄田不足供餽粥束脩不足備甘脆夫

人拮据奉養非惟無缺且若有餘恐老人見其竭蹶也
時籤尙未生先大夫篤愛鑑鏌兩孫聞啼則不悅夫人
曲體而善撫之以遂飴弄之歡先大夫八十棄養已綿
惻矣夫人手捧羹湯以進猶開目視之曰當爲汝啜一
匙指案頭書籍曰好點檢佐汝夫勤學言訖而終嗚呼
痛哉夫人哀毀倍至族黨至今稱之余依母墓之日多
凡謀菽水奉色笑敦友睦訓義方者繫夫人焉是賴及
余通籍宦江南至關中夫人食不重味衣不文綺相勗
澹以明志儉以養廉者三十年如一日教子婦慈而有
法御婢妾莊而有恩秩秩如也余素患嗽上氣疾輒夜

半呼薑飲子侍者未應而夫人先起矣屢勸引退還山
嘗作鹿車春駕圖以志偕隱去年蒙

恩致仕方冀同返故園豈意僑居金陵夫人嬰口齒之
疾經歲竟不起悲夫夫人生於乾隆壬申年九月十六
日卒於道光甲申年七月十二日享年七十有三以余
官二品

封夫人生丈夫子三長鑑嘉慶丁卯科舉人己巳科進
士翰林院檢討浙江道監察御史廣西平樂府知府娶
寧鄉王氏繼娶郡縣楊氏次鎮浙江鹽運司副使娶甯
氏繼娶上元楊氏歿三鎮甘肅涇川直隸州知州娶寧

鄉黃氏女子子二長適同邑增廣生員黃杖次適長沙
江西上清司巡檢陳玉衡孫男三爾灝聘湘潭張氏鎮
元配寧氏出爾羨聘同邑賀氏爾鴻幼錢出孫女五長
適宛平蔭生顧蘭徵三許字錢唐戚氏子餘俱幼鑑出
先是次媳寧氏及其子爾益窆於太夫人墓右平田余
於今歲清明上冢自置生壙於墓之左麓而夫人先逝
爰令兒輩扶櫬澗北卜吉安葬余當就近別作壽藏且
命鑑鎮改籍肥城長奉祠墓湘西爲祖宗邱壟之鄉先
大夫兆域存焉雖同懷兄弟子孫衆多仍命鑑從舊貫
以奉先祀於夫人之葬也並志於墓而銘之曰

夫人之德克媿先姑事姑日迫事舅日舒舒者悲生前
迫者期身後先姑此窀穸覲誰與守維余與夫人誓
傍泉臺爲子婦我欲葬焉夫人請前況媳與孫幽宅相
聯夫人之志長伸依侍克孝且慈以昌其後嗣

誥封夫人元配室人甯夫人行實

嗟乎夫人與余爲五十六年之伉儷而忍分離耶憶於歸之年先大夫方作令榆山夫人以新婦奉先太夫人赴任自長沙登舟赴東昌夏多北風三閱月始至太夫人素善病得夫人朝夕承顏侍奉幾忘其爲遠行也明年太夫人見背時已不能言猶顧夫人而頷之先大夫罷官南歸家貧兄弟三人奉養先大夫獨就夫人養酒醴非夫人釀不飲肴饌非夫人親治不食余因太夫人葬肥城之陶山頻客岱下不常家居夫人於菽水中勉供甘旨親所嗜食輒預置以待所需客至則雞犬鮭菜

必豐先大夫曰居鄉款客隨時茶飯不求備雖則云然
意甚愜也甲辰下第歸省鑑兒生七歲矣先大夫猶抱
置膝上愛之甚於諸孫謂余曰慈孫也其母善體我心
撫育有方從未聞有號哭聲及先大夫年八十病亟閉
目不能食夫人手捧羹湯以進乃開視曰吾爲汝呷一
口其爲先大夫憐愛如此然家實窶乏余歲得束修裁
足養贍夫人供奉無缺且若有餘唯以節儉自持勤苦
不倦清明躬率婦婢於園畦摘茶秋杪則手拾桐子以
易燈油至於績麻紡紗縫裳製履醯醬脯醢一切女紅
中饋之事罔弗精詳終歲食用自鹽而外皆取之室中

故不形其竭蹶也及從余薄宦江南以至關中居恒手不釋鍼黹食不重味衣不華綺者三十年如一日余嘗勸其衰老當頤養以自適答曰我自安之未爲不適也去年余蒙

恩致仕僑寓金陵夫人知其薨業無餘謂江東米珠薪桂居大不易長沙煤米皆賤尙有舊時薄田足供餽粥此間一日過活可敵吾鄉三日不如速歸余甚然其說方欲買權挈家南旋而夫人已病難支矣夫人性和順質樸助余以德尤甘澹泊不樂華勝余未通籍以前爲余養親教子茹苦食澹使余得肆力於學業已仕則以

儉養廉恒以清勤相勗余權蘇臬時眷屬寓省中有餽
歲者夫人諭老僕卻之曰爾主向不受餽此物奚宜至
哉余浮湛州縣二十年夫人屢勸引退以事牽制卒不
果壬申九秋余年周甲夫人長一歲亦於是月設悅敦
進還山之策以來春爲期因作鹿車春駕圖而屬余題
識以毋忘偕隱之意豈知又閱十春始遂初衣及攜手
同歸甫至寓廬而夫人已病病且一載乃竟不起未獲
偕返故園共宗族親戚道故舊爲歡笑空回唳鶴致嘆
鰥魚是余之過也夫展是圖潛焉不知涕之何從出也
夫人初病時三子俱宦遊四方夫人促召之余以口齒

病治之易愈何必遽令過歸夫人以爲姑息之愛遂寄
信咸至俾兒曹得生侍湯藥効親含殮不致抱恨終天
其教子以義斷恩類如此夫人湖南善化人姓甯氏九
江衛千總諱廷選之女適同邑乾隆癸丑科進士護理
陝西巡撫陝西布政使唐仲冕生丈夫子三長鑑嘉慶
己巳科進士翰林院檢討浙江道監察御史廣西平樂
府知府娶寧鄉江西樂平縣縣丞王人作之女繼娶邵
縣浙江温州府知府楊兆鶴之女次鑣浙江鹽運司副
使娶舅氏甯昌耀之女繼娶上元山東長清縣知縣楊
宣之之女歿三鑣甘肅涇州直隸州知州娶寧鄉文學

黃燦之女女子子二長適同邑乾隆己卯科舉人泰安
縣知縣黃鈴之孫增廣生員斌次適同邑候選州判陳
鵠之子江西上清司巡檢玉衡孫男三爾灝聘湘潭福
建龍谿縣知縣張家幹之女鏌元配寧氏出爾羨聘同
邑嘉慶甲戌科進士翰林院編修賀熙齡之女爾鴻幼
俱錢出孫女五長適宛平工部侍郎顧德慶之子蔭生
蘭徵第三許字錢塘嘉慶己巳科進士翰林院檢討前
翰林院侍讀 尙書房行走戚人鏡之子餘俱幼鑑
出夫人生於乾隆壬申年九月十六日卒於道光甲申
年七月十二日享年七十有三以夫貴

晉封夫人嗟乎夫人屬纊之前一日余往問疾猶謂子婦曰余病中語言較大不知而翁弗見詫否其相敬如賓雖至痛楚神弗替亂方希冀其痊可豈謂竟成永訣哉綜其孝養舅姑勤苦家政相夫子以廉正誨子孫以義方足入列女賢淑之傳不欲以內行不宜遂致湮沒謹敘次大畧傳之家乘抑以備大人先生彤管之采則幸甚矣